

四庫全書

集部

欽定四庫全書

兩宋名賢小集卷三百四十五

宋 陳思 編

元 陳世隆 補

西塈橐

宋伯仁字器之苕川人有雪巖集馬塈橐

四十

役役人間世齋頭四十年讀書雖未已作事易徒然宦

業蕉中鹿生涯葉底蟬願逢時務好一榻醉時眠

寓目

暖風輕撥繡簾開放入雙雙紫燕來燕子似於人有舊
細銜花片落粧臺

畫景逢春漸漸長博山添熱半匙香梅花一片嬌無力
自趁晴風過粉牆

久雨

暗數春來雨曾無兩日晴樹連山莫辨橋與水俱平閉

戶惟便懶逢人且問耕海棠花落盡顚顚幾派鶯

訪高菊磧

可惜吳中不見君短蓬空載一溪雲知君已到孤山下
日日梅花酒半醺

張監稅新居

為愛灘頭只兩家也來隨分作生涯依山築屋先栽柳
買地為園旋種花聊把功名循世態只憑詩酒度年華
與梅一夜論心事石鼎茶乾月未斜

尋孫花翁

東風吹雨濕西湖未許蘇堤酒贖酤
試向花翁問花訊不知花似去年無

春雪不止

春來雪意愈遲留又學飛綿過小樓
暖逐東風雖易化猛如前月未容休
鶯花消息孤詩課蠶步生涯累客愁
莫道遠人多凍殺王師亦有在邊頭

無事

日日溪頭看好山
塵囂無一可相關
梅花未必能如我
花謝花開未得閒

訪林可山

可山無日不吟詩
我欲論詩未有期
幾次孤山明月下
手按梅蕊立多時

簡施芸隱

雪後東風作峭寒
客懷零亂客眉攢
杭州雖近西湖月
寧似湖州把釣竿

丁家村

不滿十來家門閭半以柴日烘蘭入鼻風掠草侵鞦土
酒融春興行歌放客懷何須買高屋一一近天街

再會夏石芝

自與君相別駸駸已數年一緘書不寄千里夢徒然雨
店花新長風櫺月幾圓嶺梅無恙否愁滿鬢絲邊

舊同官張法曹

熬波同看楚天秋多少艱難說未休今日共依湖柳住

夢中猶怕踏歌頭

雪後

暖地難為雪，春天易得晴。
落梅狂客意，啼鳥故園聲。
愁樂從他事，湖山寄此生。
願將身與世，渾似柳稍輕。

一作葉

等相輕

紙鷁

弄假如真舞，碧空吹噓全。
在一絲風，唯慙尺五天。
將近猶在兒童掌，握中

湖上新晴

湖邊膏雨弄晴時
桃杏紅爭錦一機
楊柳也如新及第
向人爭舞綠羅衣

晚春溪竹

回文

青山數里一溪橫
片片花邊舞燕輕
耕過水田新雨足
晴天晚色柳風清

悶甚

醅醖開已殘
窗戶尚輕寒
往事多成拙
清尊強自寬
對

妻憐病久顧影易心酸更展淵明集從頭子細看

雨中

終日翻盆雨池亭晚更涼對琴思古意釀酒惜韶光綠
漲便鷗嬾殘花笑蝶忙高田皆可挿好與報君王

妙智庵

結屋古山巔源流未有年便非真隱者且喜得安然

一作

禪石洞同雲卧茶鐺對客煎我來聊小憩詩滿夕陽天

朝不識字

難字逢人問村中一小兒璋聲寧易辨亥豕以堪疑鹵

莽原非莽

草莽莽字母黨切宿莽莽字音母切

耕犁

十二齊犁字畊田器音犁

別是犁

六時犁字牛駿文良脂切

識丁何足道煮字不充饑

村學究

八九頑童一草廬土朱勤點七言書晚聽學長吹樵笛

國子先生殆不如

讀林可山西湖衣鉢

梅花花下月黃昏獨自行歌掩竹門只道梅花全屬我

不知和靖有仍孫

寄樓雲卧

雲卧西湖又幾年
吟鞍多在酒壚邊
定知今古皆春夢
不把功名作去聲宿緣
芳草滿汀山帶雨
黃梅落地水連天
相逢未識江南事
且問何時理釣船

村姑

翠鬟雙妥未梳頭
紡緝車邊坐欲羞
幾度采桑歸較晚
阿孃疑看落花愁

底事蹉跎二八年嫁時裝着未周旋年年織得新絲絹
又被家翁作稅錢

寓西馬塍

十畝荒林屋數間門通小艇水灣灣

一作灣環

人行路遠多

嫌僻我得安居却稱閒樽酒相忘霜後菊一時難盡雨
中山何年脫下浮名事只與山翁賸往還

羊角坂晚行

葛裙蒲屨帽烏紗迤邐乘涼到水涯數寺晚鐘聲未歇

滿身明月看梅花

湖上

一泓寒玉浸青山
粧點樓臺夕照間
歌管滿船春未懶
惜無人伴白鷗閒

西湖晚歸

一輪紅日倚青山
只見湖光數里間
聽得畫船人說道
錢塘門外夜深關

兩宋名賢小集卷三百四十五

欽定四庫全書

兩宋名賢小集卷三百四十六

宋 陳思 編

元 陳世隆 補

海陵稿

宋 伯仁 二

簡 吳荆溪

薄宦從來錯 寧容著意求 自慚千里夢 空作

去聲

一番愁

笑我人如昨知心兩未休
荆溪清徹底願泊釣魚舟

學館閒題

據見定時俱是足苦思量處便成癡
請君打退閒煩惱
吸粥烹茶細和詩

答林巡檢惠詩

客久情懷惡逢人懶說詩
不堪秋到後將近燕來時
敲枕皆歸夢同心只舊知
淵明籬下菊誰伴傲霜枝

秋花

鳳兒花雜雁來紅更有鷄冠弄紫茸可笑倚闌人醉後
只將青眼看芙蓉

早秋

回文

秋天一餉晚風涼笑語人傳早稻香樓上醉時簾半捲
愁添客鬢兩蒼蒼

別友人

集唐人句

菊花村晚雁來天

僧朋來

同住蘭舟未十年

許渾

今日送君

須盡醉

賈至

離人獨上洞庭船

李頻

欽定四庫全書

兩宋名賢詩集
卷三百四十六

二

對菊

少有惺惺得到頭此心何苦懶方收五湖烟雨常如昔
一撿功名自不由世事莫將真箇看客程難作舊時留
人間豈少淵明缺見着黃花便合羞

累字戲作解愁吟簡舊同寮

愁知不空白頭心事驚秋歸興滿滄洲貂蟬雖出兜鍪
功名有愧黑貂裘夷齊與盜跖縱荒丘無非蘧蘧栩栩
夢莊周空教笑倒江上烟雨汀鷗一琴一劍一童一鶴

一茶甌自不須苦苦高卧元龍百尺樓着眼看翻雲覆
雨處豪傑總成羞牙旗金甲塞驢破帽窮通一任前修
五湖千萬頃明月則儘可棹歌橫釣舟

蘇州有感

秋意滿姑蘇扁舟憶五湖鈴聲邊報急帆影客心孤野
港青如染途山澹欲無英雄應念我時事滿銀鬚

棋

亂鷗飛鷺勢縱橫對面機心豈易萌一著錯時都是錯

欽定四庫全書

兩宋名賢小集
卷三百四十六

三

寧無冷眼看輸贏

水邊聞雁

集四靈句

蘆花新有雁

徐靈暉

四面水連天

徐靈暉

清淨非人世

趙靈秀

吾詩詠不全

翁靈舒

嘲醉者

李白日斟三百盞
醉時寧記脫朝靴
一千八百萬杯酒

百歲消磨未是多

村

又是江南割稻天
家家兒女笑相牽
芙蓉占斷清溪水
獨許漁人醉艤船

離維揚

不為鱸魚憶故鄉
只緣心事近重陽
鬢絲添得三分白
空被黃花笑一場

維揚萬花園

趙制使經理

細柳營基鎖綠苔
萬花新種小亭臺
芙蓉喜見江南客
故向西風一夜開

雨中遠望

山匝濃雲水匝天
秋容黯淡荻花邊
滿湘八景誰收去
留下波心小釣船

勸僧還鄉

六言

世事無過爾爾禪心只好休休
江上數峰如削西風不礙歸舟

舟中九日

已得重陽未到家
短篷根底憶黃花
烏紗不為西風舞

空與同舟說孟嘉

登海陵城

淮楚年年一望秋
西風慣識古譙樓
金湯城壁休清野
玉帳英雄未白頭
霜草萬家人冷落
凍雲千疊雁綢繆
中原無計堪修整
且對屯兵說近愁

出陸

吳陵咫尺是維揚
徒步方知去路長
漁屋試霜蘆葉老
酒家留客豆花香
秋光淺淡人同瘦
雁影參差我共忙

僕子莫嗟行李重擔頭強半舊詩囊

瓜州阻風

狂風未許放歸船偕得僧房半榻眠落雁影收帆脚外
怒濤聲到枕頭邊黃蘆葉底秋將老白羽書中病未痊
傳語將軍多著力揚州不比舊家年

焦山簡主僧無庵

輕搖風漿過焦山山色相留半日間萬頃月波秋雨後
一篝燈翠夕陽間城依鐵甕心猶壯酒對金峰鬢已斑

願得淮西來好語吸江亭下且怡顏

瓊花

莫訝重栽聚八仙幾經邊警亦堪憐
珠簾十里春狼籍且把天香作舊年

兩宋名賢小集卷三百四十六

欽定四庫全書

兩宋名賢小集卷三百四十七

宋 陳思 編

元 陳世隆 補

西塋續藁

宋 伯仁 三

安居

窮通豈在苦勞神且作安居嬾散人買地種花多種竹

煮茶邀客也邀隣求名豈識書三上得興無過醉一巡
喜得滿園收芋栗杜陵應未笑全貧

有感

窗戶清清半掩門小兒指淚立黃昏幾多心事無人問
獨看梅花月半痕

聽琴

靜夜聽鳴琴秋風動幽谷何為鍾子期千古無人續

褚先生

先生邂逅龍亭日多少雲仍滿世間千古典謨文獨記
九流毫髮事相關代庖阿堵名尤重製甲防邊職未閒
只與道人為鶴帳始能清夢繞湖山

歲旦

己亥嘉熙三年

居閒無賀客早起只如常桃板隨人換梅花隔歲香春
風回笑語雲氣卜農穰栢酒何勞勸心平壽自長

五老

儒將農漁女

壯年期佐漢中興豈謂蟠龍睡不醒可惜滿牀廷對橐

白頭翻綠

疑是錄

道家經

老儒

髀肉豐腴鬢髮疎將軍健飯待何如七禽不了中原事

羞讀君王問勞書

老將

齒髮俱無背已駝雨耕摩破幾青蓑高皇慶壽推恩語

暗讀全文忘不多

老農

短髮衰髯一棹船白頭波浪幾掀天兒孫各占蘆花住

網得鱸魚即酒錢

老漁

著破箱中欲嫁衣翠顰何止只憂葵春來偷摘斑斑髮

淚濕菱花只自知

老女

遠訪友人不值留集句一絕

寒食花枝插滿頭

范成大

長亭搔首晚悠悠

鄭毅夫

灞陵女

子無人識

王奇

別是天涯一段愁

陸游

寄征夫

待君君未歸寄書書不去寄書書可去有意殊難語深夜彈琵琶思君在何處知君在何處不禁春事已闌珊東風吹起楊花絮東風吹落楊花絮

客樓戲集唐人句

門掩楊枝一夜風

杜牧之

自憐羈客尚飄蓬

李山甫

不堪吟

罷東回首

僧朋來

鳥倚巖花戲晚紅

杜荀鶴

贈僧了性

雖然年紀小
胷次已江湖
貝葉連宵看
梅花一樣臞
記詩誠敢許
戒酒恐應無
好向蘇堤上
行行掐數珠

醉中登樓

明主何嘗棄浩然
杯中有物且隨緣
倚樓心事誰消遣

一點飛禽落釣船

嘲燕

年來乳燕亦堪羞
不學楊花得自由
飛過幾家門戶去
直須尋見最高樓

瓶梅

南枝斜插古軍持
瘦影參差落硯池
莫道人家窗戶暖
等閒忘却隴頭時

春半

春到已多時
遊人替衲衣
柳眠鶯喚醒
花瘦雨添肥
官事癡能了
人情久已非
一負能自守
贏得掩柴扉

散愁四首

著意功名四十年
柳花空滿鬢絲邊
男兒無補朝廷事
有媿飢餐困即眠

小樓呼酒揖青山
翠碧瓏璁一笑間
山若有情應問我
如何猶似野人閒

清貧如水儘無妨
只願伊周立廟堂
扶起太平千載脈

且隨農父樂耕桑

旋買犂鋤學種田一聲長嘯雪溪邊
微茫白水山如畫
好箇江南萬里天

午睡

午夢驚回筍簟涼
坦夷襟度即瀟湘
詩高自與梅花好
食淡方知菜味長
事說萬端多畫虎
人無一念不亡羊
滿頭飛絮春零亂
莫笑狂夫老更狂

酒邊

一醉復一醉陶陶醉未休何傷於日月知我者春秋萬
事難追昔千金不解愁白鷗飛浩蕩此興屬漁舟

小舟晚賞荷花

四文

天浮月影水浮天路繞山頭樹繞烟船小小行人意適
藕花新索酒杯傳

清明插柳

清明是處插垂楊院宇深深綠草藏心地不為塵俗累
不簪楊柳也何妨

晚春

風飈殘花滿地紅
別離樽俎漫匆匆
春光未肯收心一作

純收去却在茶蘼細影中

綠陰陰裏惜韶華
自縛筠梢掃落花
可笑游人心未嬾
杜鵑啼處撥琵琶

清和

詩債還無足
家園亦倦看
客遊宜致仕
午睡當之官
舌笑張儀在心
憑達摩安清和
天氣好應免夾衣寒

久坐

久坐如忘世松窗日未斜
營巢鷗噪樹作去聲夢蝶眠花

易課推三畫醫方錄數家
瓶笙聲未絕更點土山茶

戲作

青梅黃盡雨無多柳影重重午
日過忽聽隔籬人語笑

採蓮船

一作艇

予上新河

玉泉寺金魚

金鱗韜隱已多時寺壁重泥人
有詩龍若久懷霖雨志

不應蟠一小方池

僻居

居僻恬無事開軒挹晚晴
雨耽雲脚重風約燕身輕
有子爭梨栗無朋問死生
每憂人載酒剥啄打門聲

倦吟

競病推敲欲嘔心何如危坐憩桐陰
新蟬咽咽知人意學我年來抱膝吟

云云

休將閒耳聽云云只作深居耳不聞素志肯隨時節改
清貧難計利名分忘情茆屋無非燕著脚青山獨是雲
試問急流誰勇退故園同看木欣欣

愁

愁懷難盡

疑是畫

亦難詩惟有流鶯暗得知我亦無言鶯

不語柳邊相看立多時

夢花

秋到梧桐我未宜夢花何事已先知朝來數點西風雨

喜見深紅四五枝

嬾

嬾嬾復嬾嬾

一作嬾嬾
嬾復嬾

而今嬾更疑此身聊復爾萬事

欲何之尚覺瓢為贅奚煩鍤自隨客來眠正熟
題詩

書座右

天地一蘧廬吾身自卷舒翁能從失馬子亦豈知魚
獨甘居漏安貧且飯疏昨非今未是寧不賦歸歟

書座右

蠻觸小功名須教一念輕受恩知報飯臨事貴懲羹
域惟仁宅心田以道耕泰然忘物我無使狎鷗驚

涼

不擬西風一頓涼看看涼近木樨香人家未得征夫信
蚤有砧聲却雁行

荷花

綠蓋半篙新雨紅香一點清風天賦本根似玉簫溪以

道心同

扇

師璋今有幾家同名重蒲葵價亦穹髹柄但誇千縷骨
不知曾未掩東風

中秋月

只與閒時月一般寧知今夕最團欒竹邊借柄還如扇
花下傳杯可當盤野兔易忘終夜夢林烏未許一枝安
人生幾箇中秋節那得都將笑眼看

席上有舉東坡集歸去來字成詩十首雨中戲續

一首

傲去欲何求歸來已倦遊
琴詩聊自笑丘壑復相留
問菊時攜酒乘風或棹舟
樂天良有以心事老田疇

漁父吟

小舟如鴈許穩穩下波

一作波

心蓑笠幾風雨江山無古

今清歌鳴短棹紅葉滿疎林
一醉不知世前村月未沉

秋風

秋風卷秋葉秋思滿秋天骨立山如削聲低鴈欲眠客
愁無暇日農事喜豐年說著鱸蓴事歸心滿釣船

聽雨

凍雨瀟瀟未肯晴灑窗聲似煮茶聲山童酤得鄰家酒
炒栗爐頭獨自傾

村田樂

打稻天如二月天滿邨和氣樂豐年田翁爛醉身如舞
雨箇兒童策上船

問梅

癡風裊裊送寒來
竹裏人家總未開
唯有老巖心事苦
瘦筇敲雪問梅腮

山下

山下六七里
山前八九家
家家清到骨
只賣水仙花

落葉

捲地西風促雨來
掃除黃葉滿蒼苔
垂楊蚤有青青眼
只礙梅花未放開

梅蘭

清標同插古軍持清似西山凍餒時嚼蕊弄香無說處
屈平和靖亦何之

佳人歌

淡傳粉淺畫眉鬢邊休插桃花枝白面郎君馬如箭回
頭再盼情依依文君未識相如面朱絃聲裏猶相戀風
流勝事千古傳寧知文君當時深處深庭院臨邛亦免
王孫怨佳人佳人休捲簾門外落花春正甜繡牀午困

語聲寂博山漸冷香頻添佳人憶佳人吁今人安得人
人思秋胡黃金不認真丈夫

醜女歌

梳風楊柳笑沐雨杏花羞看看三十餘不敢下粧樓待
媒媒不來對娘娘共哭何時王右軍來坦東牀腹君不
見西施絕色天下缺能使麋鹿走吳宮玉環一笑百媚
生能使漁陽鞞鼓驚玄宗無鹽無鹽形貌惡當時一段
議論千古生清風美婦未必美所美貌徒美醜婦未必

醜所醜行不醜醜妻惡妻壽乃翁何須能勸羊羔酒

曹娥謝趙菊莊相訪

江城潮汎小砂磧纜行舟挈酒尋詩好披心話客愁雲
歸山欲暝風急雨如秋可惜相逢處匆匆不少留

值雨

吳陵雨月雨畱連來問瓊花落砌邊市酒未消狂客恨
塞鴻先作嫩寒天只憂松下無三徑不管囊中欠一錢
揚子江頭風正急未知何日買歸船

寄舊友

男兒未遇總英雄
漂飯非憐計已窮
鮑叔但能知管仲
孔明猶必拜龐公
秋江萍梗人何處
夜月梅花夢亦同
借問選詩編幾許
元暉瀟散漸唐風

題象山縣棲霞觀應真亭簡住持張羽士

杜鵑聲裏立東風
山色應憐鬢已蓬
二麥曉寒新雨後
一年春事落花中
醉斟浮蟻邀仙客
笑揖飛鷗問釣翁
簷外萬竿君子竹
虛心能得幾人同

村莊即事

青旗獵獵又村莊
仙景還他是故鄉
叟有七旬頭未白
山無重數葉初黃
稻畦明月家家酒
茅屋清歌處處霜
晚菊一籬秋欲老
客懷牢落愧重陽

別朱冷官

客中奔走易蹉跎
學館癡留月又過
橙蟹醉斟知己重
鱸鄉話益人多
吳陵今夜三更月
雲水明朝一棹歌
船在白蘋亭下過
有無傳語曬漁蓑

邊頭老馬

解下韁繩便欲眠，絕無筋力可勝鞭。
霜蹄徧識淮南地，夜草猶吞塞北烟。
怕逐綵旗排偃月，寧思金鉉赴朝天。
華山自有安身處，試問將軍任幾年。

夜過烏鎮

望極模糊古樹林，灣灣溪港似難尋。
荻蘆花重霜初下，桑柘陰移月未沉。
別情懷雖戀酒，送衣時節怕聞砧。
夜行船上山歌意，說盡還家一片心。

簡張寄翁秀才

徽外琴聲局外棋
此心能得幾人知
縱橫漫說三千字
陶寫須吟百一詩
秋到蓼花蟬噪後
雨敲荷葉釣歸時
西湖儘著張公子
莫把吟篷月共移

呈菊坡先生陳樞使

但知猿鶴伴閒居
不覺憂時鬢已疎
對客怕

一作懶

言今

日事挑燈重讀少年書
樓迎山色詩堪畫
門對梅花月共鉤
相業累興明主意
先生只恐自躊躇

駕鶴林吳尚書赴召隆興

鸞翔芝蘭下溪堂醉夢驚回午正涼
寵報帝俞催宰相
宜將州綬召文章
蘋花襟袖宮花近
詩草簾櫳諫草香
大化一新多吉士
卷阿歷歷告成王

苦風督醴課甚迫

僕僕馳驅夢不安
猥哉誰恤買醴官
星臺閣住春來俸
雨意翻成夜半寒
人可與言能幾輩
事難區處更多般
桃花一日多開盡
插滿銅瓶亦倦看

秋雨簡劉主簿

秋到天涯未兩旬
西風無日不霖霖
數行新鴈千門曉
十幅輕帆萬里心
薄宦只宜聞早去
長淮未許作狂吟
江南誰倚闌干曲
丹桂香中酒自斟

呈留耕先生王侍郎

夜雨篝燈夢未閒
十年殊愧屋頭山
喜聞鐺脚濤聲起
不憚吟髭霜樣斑
漁釣醉歌人所願
功名心事國相關
辟書笑倒梅邊鶴
盡在先生指顧間

寄題臨江王實齋司戶百花洲

錦囊詩句識花洲何日清江得醉遊百畝故園重

缺

四賢遺像愈風流香浮紅樹春應早雪壓寒梅月想留

我有煙波漁具了

一作在

一絲風底願維舟

夜坐

栢香煙裏瀾山茶窮似燒丹道士家窗紙暫明寒月上

一肱清夢入梅花

秋田小立

兩間茅屋是誰家淺水汀洲舞荻花牧笛數聲紅日晚
自慚身似客天涯

兀坐

對坐清清一穗香悄無人語日徧長硯盤數點梅花片
暗引游蜂度粉牆

晚涼

兩兩蟬聲送夕陽竹陰移綠上藤牀黃昏急雨無多子
喜得今宵夢亦涼

夏日二首

泓泓圓碧漾新荷獵獵斜風顫綠莎農事正忙三月後
野田齊唱插秧歌

數點沙鷗掠野塘雨聲初歇水微茫橋邊十里荷花蕩
輸與漁人卧晚涼

兩宋名賢小集卷三百四十七

欽定四庫全書

兩宋名賢小集卷三百四十八

宋 陳思 編

元 陳世隆 補

芸居乙藁

陳起字宗之錢唐人寧宗時鄉貢第一時稱陳解元
事母至孝開書肆於臨安鬻書以奉母時史彌遠當
國起有詩云秋雨梧桐皇子府春風楊柳相公橋哀

濟邸而誚彌遠也寶慶初李知孝為言官見之彈事
一時江湖之士同獲罪者六人而起坐流配焉尋詔
禁士大夫作詩彌遠死禁始解其詩有芸居乙藁一卷
安晚先生賦以丹劑四種古調謝之

陳子一畝宮居來七十年當其春盛時庭花發幽妍轉
燭長養天青子垂簷前秋收備百禮冬享意則虔年來
風雨陵垣倒壁四穿上漏下卑濕敗隙遙瞻天三生結
施仁覩此殊興憐捨以四條柱俾之撐危巔工師得大

木裁製精且專尚欠櫨與楨况復棟與椽再干大檀越
結此歡喜緣

履齋先生下頌參附往體以謝

有客號奚毒西來自赤水外負炎炎氣内存溫粹美當
年楊天惠夸大不絕齒解后段氏子即之殊可喜卻邪
迺素心調中古無比世仰大醫王民瘼咨朝市二子願
托身赴湯任驅使興憐維摩老遣前護衰毀病魔亟退
舍怡然得安壘緬想蓄牛溲陋哉子韓子既非瞑眩劑

厥疾無瘳理一念衛生恩百拜額加指

友人新息滿月

蘭砌惟傳書種子寶刀剃髮月初彌絕憐雅致高於俗
點易殘朱抹顚兒

汎潮紀所遇

六橋鶯花春色濃十年情緒藥裏中筆牀茶竈塵土積
為君拂拭臨東風可笑衰翁不自忖少年場中分險韻
畫舸輕移柳線迎侈此清游逢道韞銖衣飄飄凌綠波

翡翠壓領描新荷雍容肯就文字飲烏絲細染還輕哦
一盃絕類陽關酒流水高山意何厚曲未終分袂已揚
一目歸鴉噪棲柳

賀友人絲桐復歸

春到牡丹花事闌惜春約客遊湖山烟光萬態屬吟思
白石清泉流指間雙成解后蘭舟駐索紙大書春草句
成此風流一段奇樂事百年能幾遇薄暮歸來雨濕衣
買舟底此十三徽小梢愚悞阻人意客散河梁燈火微

方將清事夸兒婦桐君羽化無何有一壺千金何處尋
愁絕瓠已無措手要知煩惱所根株以愛布種上聲當芟
除趙壁既返懽如初哦詩稱賀敢後歟

適安惠糟蟹新酒

偉哉無腸公橫行占江湖幾欲肆其雄上山攫於兔無
端四五輩懷椒尋酒壚枕藉糟丘下醉魂呼不甦尚想
橫戈勇胷次與世殊開懷風味佳大丹液膏腴此寶君
所儲何為貽老夫麴生挾之前爛然陳座隅當其左持

螯不知竭此壺酩酊無何鄉軒冕不關渠東望歌老饕
前溪梅影疎

題適安清湖寓居

薰風軒檻曉晴開鬱鬱桐陰手自栽二水合流當戶過
一山分影入樓來琴逢良夜時揮弄詩欲名家巧剪裁
可羨一屋安所適紛紛車馬汨黃埃

燈花戲簡西隣

西隣逸韵偕秋清瑤琴曾許月下聽神馳吟境日復日

欽定四庫全書

正書名卷四
卷三十四十八

金鸞轉矣寒此盟昨夕相逢再有約六花飛時湖上行
短檠不密泄此意輝煌粟粟攢金英闌堂一笑前未覩
信手閒閑燈花經一主飲席設林麓一主盍簪獲良朋
便欲箋天檄滕六銀盃逐馬快此情曉來喜見萬瓦白
迺是天宇清霜明得非分去聲薄誤燈花還復燈花戲老兄

武兄惠藥

昔人饋藥不敢嘗未達寒溫良毒旨朝來剝啄客問病
寶劑盈奩意何侈便當三咽答殷勤兒欲先嘗還且止

平生結交結以心豈有鴟人羊叔子多君相濟義薄雲
友道綫絕今振起綠陰庭院起清和抖擻精神迎藥喜
秋懷

又見街頭賣紫茱老懷擾擾類催租客來喜得吳江紙
欲寫新吟一字無

懷三山友人

春前深惜別病後政無詩青入生菱角紅應熟荔枝魚
甘賓席暖風逆客帆遲徒結連宵夢郵音負所期

寄彭勿庵

一片巴江月移輝到庾梅孤山春事早疎影望東回

以仁者壽為韻壽侍讀節使鄭少師

丙午

一氣妙磅礴萬彙屈者伸方寸函太極宇宙皆吾仁
端平改化絃真儒手洪鈞厥今扶公道皆昔夾袋人
丙午成樂歲甲午無窮春

宮堯閭闔雲蹠蹠繡鞍馬細氈侍珠旒治道談帝者
歸來西湖濱岼幘松蓋下秋淥晚涵山揖以薦瓊斚
北第

何三辭泉石懷綠野

賦詩投金瀨俸入猶半有輝煌奉國節一粟迺不受羸
副初何心國計要豐阜一丸濟世德陽報期千壽會須
煩潞公再與佐元祐

枕上

病與仇謀酒作成藥爐又復伴深更隣鐘自是常時聽
纔到霜天分外清

郭聖與黃希聲問侯

山有靈芽可點金
名醫未遇若為尋
藥房掩畫情多感
竹榻逢秋老不禁
座上遍將唐帖揭
架中間取晉詩吟
病懷行此相料理
更接蘭交問訊音

過三橋懷山臺

賣花聲裏憑欄處
沽酒樓前對雨時
景物如初情自老
夕陽波上燕差池

題玉泉畫像次來軸韵

六言

康隨寒策穿雲邈
迓靈峯時節含
臺誰貌閒情莫
盡宵

中風月

奉酬竹溪陳使君新詩墨梅之貺

千里雙魚貫草堂中藏壞異夜騰光興因東閣增懷想
影落前榮不寄香四韵休誇毛穎伎幾回曾誤壽陽粧
感公意過兼金饋慚乏瓊琚展報襄

壽大丞相安晚先生

嵯峨補陀山下視海水流風波定以稍穩穩濟川舟皇
穹祐炎祚黍稷慶有秋繁誰致此祥上相今伊周赫赫

命世賢師道輔前旒暨湯同格天康濟仰廟謀向來三
邊塵化作和氣游橫戈枕月戍擊壤歌西疇小春明日
是泰階射斗牛見說老人星交耀光九州宣勸下紫宸
彫盤羅珍羞北禁詔墨香昌熾頌魯侯鰥生戴厚恩一
詩何能酬擬辦八十首從今歲歲投

紙帳送梅屋小詩戲之

十幅溪藤皺縠紋梅花夢裏悶氤氲裴航莫作瑤臺想
約取希夷共白雲

迎月

尊酒貪迎月人生醉後嘉夜來
窻不掩吹落一瓶花

止酒示恚

一病杯中物致危翰林何事酷耽之
酒經若果神仙道不向青山立斷碑

適安有湖山之招病不果赴

蘭契蔭以詩金鑑而玉戛招邀訪逋仙
劇飲擬投轄事有違人意十常居七八
文園病政濃況復泥濘滑老懷

欲舒散天心若是愁

適安和附

人生欲四并其難乎
戛戛春工鬧花柳
春露阮車轄
何當載酒歌對舞
花十八樹色尤綠
秀鶯聲尚圓滑
作詩調維摩病安情已愁

槐隱和附

新篁褪錦衣
風玉漸相戛
香紅吹成塵
春去誰管轄
歌酒相留連
一笑攜二八
敗意林間禽
饒舌泥滑滑

可人非不來正坐天意恕

挽梅屋

桐陰吟社憶當年別後攀梅結數椽湖海有聲推逸韵
弓旌不至嘆遺賢鬼收殘藁能傳業自誌平生不愧天
航便雙魚無復得夾山西望淚潺湲

挽林夫人

劉後村母

懿德遐齡世所尊濃薰班馬到諸孫
疏榮花詒加宏邑賜第蘭增侈異恩
了了三乘言外趣如如一性定中存

魚軒應向西方去知在蓮花第幾根

病中偶成

平生謹樽酒投老更齋聖優游接嘉賓能使百憂屏可
憐陶士行飲少亦致病豐下改舊容浮采滿青鏡升降
氣失常醫經云上盛亟試黃昏湯要期勿藥慶朝來覺
清爽臨窗發幽詠

薄命

薄命畏庚金那逢閭茂臨一尊花下飲半載藥邊吟食

味同元酒形骸類槁林但存元氣在會見綠成陰

消遣

夜雨生寒換夾衣形臞貌悴嘆衰遲病中何物能消遣
一榻揩摩十載詩

題西窗食芹藁

曾味西窗藁經年齒頰清細評何物似碧澗一盃羹
一念

一念無塵雜三更有夢回同他石橋老過水探寒梅

買花

今早神清覺步輕杖藜聊復到前庭市聲亦有關情處
買得秋花插小瓶

一榻

一榻世緣輕毋將事物繫昔人言豈誤慧自靜中生

同清兄看猿

藜杖同僧扣應門野叟閒放他猿摘果莫把白雲關

薄暮

寂寥誰作侶耿耿一寒缸薄暮西風急呼童掩却窗

秋夜懷康節

無眠輾轉聽更殘心緒如絲起萬端煎藥爐邊童夢曉
讀書檠下婦紉寒狻猊斷火香猶婉促織催秋袂怯單
願子大賢康節語此情於我一般般

冷泉凭闌

此山泉石勝還思日日登那知三生前不是住山僧

冷泉邂逅友人留飯

倦叟尋芳藉短筇故人邂逅一樽同
明霞浸水疑鋪錦彩閣橫溪儼卧
虹猿去復歸啼曉嶂僧來相伴立
春風雪濤湍激開寒閤滌盡塵襟
萬慮空

黃路鈴詩來告別

玉泉馳一紙八韻有情詩不肯面
相別恐成離索悲江聲噴岬拆潮
勢激帆危舊制邊州守方今曲轄
司

適安招遊湯鎮不來赴

湯鎮古祠宮招邀及倦翁輕裘乘
曉月駿馬逐東風野

色觀無分春光病見攻行將迎誕日一瓣擬遙通

寄東齋

又復逢初度疋羸異昔時預愁臨丙戌所願值天醫剪
綵裝茶果裁戕薦壽卮今年都告免湯餅却相宜

寒吹

寒吹西軒入眾愚設座隅腰圍同沈約指爪類麻姑靜
卧氍三疊清齋飯一盂曉來香滿室巖桂侈餅鑪

適安夜訪讀靜佳詩卷

情同義合亦前緣得此蘭交慰晚年旋焚古香延夜月
試他新茗瀾秋泉君停逸駕談何爽客寄吟緇句極圓
可惜病翁初止酒不能共醉桂花前

所適

釣鼇東海頭經春醉一舟西溪拗冒入小鮮終日求

庚戌秋作

甲辰述邈至今年藥竈殊勞日夕煎血氣任他銷與鑠
向來詩骨已成仙

耘業許印章四韵叩之

近因稚子傳來意知許衰翁兩印章
字畫莫教凡手刻形模當取古人長
六書今獨行秦嶧三體空聞設漢庠
後世陽冰能復古未知何日寄文房

婚嫁

婚嫁債羈縻何時是了期
每嗟身外累無出女和兒
聽漏寒無夢添香夜有詩
沉沉澄萬境梅影月初移

六言簡耘業

露溼螢光愈熾月斜蛩韻尤清微物得時若此人生可不求名

束起

束起仙翁肘後經且參思邈枕中吟夜來獨卧寒無寐
憶殺黃紬舊破衾

聞隣寺粥鼓

寒缸旋擣動冥搜泓玉庠研萬象愁鐵版響廊催早粥
銅壺添水易新籌一聲鷄唱驚殘夢再聽鴉羣過小樓

可惜秋光惟帶隔料應河漢五更收

汪夫人筵上口號

今朝王母讌西池
葱蒨祥烟靄繡帷
坐摘蟠桃華壽席
行看丹桂發孫枝
魚軒錦轂花千疊
鸞誥金鈴絡四垂
好是殷勤千歲祝
老萊先酌後門楣

儵然

向來蓮社本遺忘
勾引淵明造道場
梵葉翻殘空佛印
念珠持久現圓光
秋花依約生涼意
暑雨微茫送夕陽

客退飯餘無箇事，偷然一枕到羲皇。

風雨作

無成老見過望望，太平歌驚雨愁。局戶聞風慮偃禾，
中醇止久瓶底粟無多。缺畝憂時切天乎，少警何

葵窗送酒

久藏斗酒謀諸婦，婢子倉皇錯授醺。邂逅芸居初止酒，
小厨海錯旋開泥。

望曉

要知筋力衰多少一覺纔回常了了
隣鐘無奈五更何
望斷窗紗不能曉

湖上即事

波光山色兩盈盈短策青鞋信意行
葑草烟開遙認路
柳條春早未藏鶯誰家艷飲歌初歇
有客孤舟笛再橫
風景無窮吟莫盡且將酩酊樂浮生

朝宗餽食且復招飲

相親逾骨肉何以結情深
下箸覺可口同盤還上心
撥

反君句就曝背我寒侵屢有梅窗約行將共晚斟

送印寒鄧簿得闕西歸

才藻世於家勾朱新職華學能如藝未春到可生花野
店寒吟月輕裝曉度沙君行余止酒一念一興嗟

印寒
取山

谷藝未印

歲寒句

主示急須制作亭當喜成一絕

博古圖中無此樣繫誰丘意巧胚胎槐堂新送黃封酒
便可衝寒暖一杯

梅花怨為汪耘業賦

庚戌

嶸嶸歲事春將至
寂寞梅花雪失期
獨有垂楊伴幽怨
豈堪臨水折長枝

舊題隱者壁一絕

妻嗔山犬踐園蔬
兒釣溪魚餒鶴雛
總道村居無外事
有人庭下索詩逋

酬成賢良

英

獻璞無成戲弄環
世間得失事相參
劉蕡不得言時事

半為當時記樸庵

同友人汎舟過斷橋登壽星江湖偉觀歸舟聽客
謳清真詞意甚適分得江字奉寄李大著鄉執兼

呈真靜先生

辛亥仲春將徂兮有客踵門曰風日流麗邀余共泛西

湖之舫

皮江切

舫南去而忽西兮昨之折檻今復稀以成

杠背蘇堤萬絲之綠陰兮望一簇孤山之青橦

傳江切

層

峰疊嶂巉絕露天巧珠英琪樹發越地之靈一聲何處

兮鐘種蒿師告余曰此壽星古刹上有奇觀開宇宙於
八窗捨舟策杖步步巍峩謝屐殊勞雙回廊曲轉忽軒
豁檐飛棟複青綠交輝心開目駭而揖西子之湖子胥
之江觀者雜還儵去儵來余獨凭欄境與心會便欲馭
風跨蜿蜒虹切胡江烟雲萬態客擬狀而運思羿今老退且
遜銳逢莊嚴世界合爪讚嘆要使天下名山夸詠者睹
此奇偉而心降風寒下山吹欲倒連呼春酒亟開缸簫
鼓畫船徒自紛耳目何如美成清絕按新腔詩成肯對

俗子哦馳介城南寄老龐

舊挽汪隱若

汪守泰
子父

棲志浮雲小萬鍾帶經高壘度春風義方莫問當年事
十五男兒識阿戎

又

遺碣鑽辭掩夜臺修文空嘆送餘才鹿坡明月成惆悵
不見高人自往來

靜江商宰書來且索鄙語要道其冰雪相看之意

古調代書

連牆不通問千里迺寄音平生於締交淡泊味最深吳
山青神天應同碧玉簪尚憐風馬牛睽若商與參一聲
南來雁西風又相尋君其念衰朽余亦懷瑤林一庶了
官事吟外時鳴琴識量萬頃陂文華實南金向來唐相
璟疑事問崔琳諸臺貴得賢而肯捨此琛會晤喜有期
寬此離索襟

安晚先生送自贊太上感應篇帙首御題諸惡莫

作衆善奉行八字輔以佑聖像一軸兩詩見意云
公袞殊相念奇書寄布衣此心纔動處萬善要同歸本
旨詳敷衍奎題重發揮應憐蘧伯玉投老始知非

稽首元真像當年助我軍龜蛇俾聖武龍鳳煥奎文劍
聳燒空焰旗翻渡海雲上公傳琬琰分惡感殷勤

雜言送歛硯廣香與友人有懷楊校書

幼度

我有龍尾雙槽之硯肌潤而若沐涇濛舊藏古香氤氲
來自廣之東多君博雅舉以為贈三嗅而抹月批風要

若鎔金加萬佛經上更須滴露點四聖書中往昔濃薰
懷太史而今一瓣為南豐藜光下照人何在閣下閒花
馥舊叢

真靜鎖新茶孤乾黃獨乳酪約葵窗適安共享適
安不赴葵窻詩來道謝次韵答之兼呈真靜適安
千載靖節翁秣向公田種萬鍾於我何肯戀五斗俸長
歌歸去來田園聊自奉高蹈世莫儔器局小管仲嗟余
昧於時退思心每痛世人不我知小畦親抱甕唯有竹

宮仙時復致一供四清山中珍凡目為之動黃獨前未
識勿謂仲宣春春茗摘新芽秋菰懷舊封江南貴乳酪
此意兼金重得君同下箸詩來再三諷韻意兩相高文
史嘆足用續貂愧狗尾敢與賢者共語奚較工拙年來
此心縱軟飽黑甜餘無復春草夢可人招不來屬篇亟
持送

哭丹池王隱居

憶昔相逢初一見即刮目出處雖不齊椒蘭則同馥論

心到極處情愛踰骨肉十年傳成癖捐閉門讀高志
尊所傳而肯曲從俗抱此奇特操平步可金玉况復同
窗友槐庭秉鈞軸事有反所料軒冕笑羈束縉雲邈千
里訪道求辟穀食棗懷安期竊桃小方朔平生精進心
自可登仙錄一着偶失筭九書無復續洞霄有猿號丹
池無鶴浴昨病失會葬生芻東望哭

寄汪起潛簽判

飛雲起伏龍大鵬運以風風雲一朝會前塞今迺通斂

莫賢景略時哉使其逢腰錢與騎鶴事或有適同青門
瓜吹香綠水蓮泛紅人物王謝家風雅眼底空參畫聳
臺府宜護碧紗籠鄰江萬折東獨鶴摩蒼穹浮圖快一
擲歸騎先賓鴻

史記送後村劉秘監兼致欲見之悰

昏瞶嗟耳目管絃堂上調世事每相背秋月虛良宵涓
吉擬登龍疾雨驚風飄襴刺不得前東睇心旌搖近履
傳康強變體筆更饒風響雖時接未若親聞韶憶昔西

湖濱別語讀教條囑以馬遷史文貴細字彫名言猶在
耳堤柳凡幾凋茲焉得蜀刻持贈踐久要會晤知何時
霽色審來朝



兩宋名賢小集卷三百四十八

欽定四庫全書

集部

兩宋名賢小集卷三百

四十九至
五十八

詳校官中書臣閔思毅

助教臣常循覆勘

總校官編修臣王燕緒

校對官編修臣王天祿

謄錄監生臣徐豫吉

欽定四庫全書

兩宋名賢小集卷三百四十九

宋 陳思 編

元 陳世隆 補

四明吟藁

吳潛字毅夫宣州寧國人嘉定十年舉進士第一出入朝省不常兩知慶元府兼沿海制置使勛德最著浙東人士至今誦之為人剛直敢言其所疏奏及與

宰相論辯忠憤激烈皆人所不敢聞者先以忤時相
罷奉祠既而賈似道銜之不已安置循州乃除其私
人劉宗申知循州屬以黃祖之事百計殺之潛預知
死日語人曰吾將逝矣夜必風雷大作已而果然四
鼓開霽撰表作詩頌端坐而逝循人咨嗟悲慟焉

鎮海樓

賈山深處古明州新有江南客倚樓鳳闕天連便望日
蛟門海晏不驚秋頭顱已迫殘年景身口聊為卒歲謀

蕭颯西風吹敗葉滿眶清淚自難收

占春亭

桃花幾片隔牆飛獨自危樓徙倚時目送斷鴻雲外沒
東風吹淚落天涯

翠山勸農

小隊旌旗上翠巖松風十里鎖禪關水深水淺高低澗
春澹春濃遠近山鄉思猛隨蒼鳥去客心暫與白雲閒
天公已是多情煞時把淋頭雨放慳

聞同官會碧沚

碧沚堂前睇水官只應喚作玉壺看
頗聞秩秩玳筵展莫遣匆匆銀燭殘
酒付別腸寧怕窄詩由廣舌不憂乾
老夫孤坐三更月欲往從之良獨難

萬頃蟾光浩不收花汀竹嶼思悠悠
黃公所隱知何地賀監宜歸乞此洲
良夜最佳惟午夜今秋偏好是中秋
舉盃洒露月同吸仰面青天可問不

張學士故居

春來物物攪愁腸
排遣惟應閒醉鄉
無奈督郵風味惡
桃花流水願分嘗

天寧長老新齋堂請轉語

慧公幻出一齋堂
巨棟危梁壓十方
更有心堂無量濶
濶中別有好思量

秋風歎四首

長鯨海上來壯士
田間起登城復何悲
禾稼秋風裏
誰將訟風伯謂天
慙雨師天閭幾萬里
瞋瞋安得知

軍書督戰急縣吏催租還力盡將何訴浮雲深九關
嘗聞海客談白浪海風惡祇是欺詐艫那見摧蛟鱷

題舒蓼瞻嘯圃獨吟圖二首

丹崖白雲往來絕岼沅潮吞吐我所思兮何人莽悠悠
兮太古

江口寒潮自至山間明月誰招自可歸來坐嘯何須世
上折腰

聽琴客周信民彈秋泉二首

雁湖龍井久知名總入君家匣裏清客舍試彈三兩曲
恍疑飛沫濺塵纓

故里泉聲不可聞攜琴相約鮑參軍山瓢只繫經行處
落葉空山好覓君

陸宣公祠

凜凜清規百世師功名僅見奉天時忠謀任起姦邪忌
感泣寧無士卒思落日桑榆存舊蹟西風蘆葦護荒祠
忠宣流落何遺恨留得良方與後醫

錢塘江三首

江頭風雨弄輕寒
小艇輕蓑把釣竿
日暮滄浪歌漸遠
延緣應自避塵冠

扁舟東下白雲鄉
一水牽愁萬里長
多謝白鷗閒不去
知余機事近來忘

秋光漠漠草青青
日落江流雁下汀
世路風波今始半
為余遙謝草堂靈

兩宋名賢小集卷三百四十九

欽定四庫全書

兩宋名賢小集卷三百五十

宋 陳 思 編

元 陳世隆 補

瓜廬詩

薛師石字景石永嘉人敷文待制弼之曾孫也磊落
有大志多讀書通八陣八門之變善楷法尤工篆隸
築廬會昌湖西題曰瓜廬與朋好日舉文會於世味

澹無所羨年五十一卒瓜廬集其子峻所編嘉熙元年東閣趙汝回為序

瓜廬

近來有新趣買得薛能園疎壤延瓜蔓深鋤去草根花時長載酒月夜正開門最識田家樂辛勤更不言

瓜廬至日即事

西山起還伏插入萬丈潭漁叟操桂棹樵歌過草庵年荒酒味薄天旱井泉甘不願丘園貴惟將易自參

送趙幾道赴台州錄事

聽前綆汲何從來清流海底通九垓天河地脈隱旋轉
上中下井纏三台滿城桃花二仙種方廣金殿三門開
一時會上幾許人若匪佛種應仙才于公徒知高其閤
豈識大化非胚胎今之送言暫相別詩規筆誨紛崔嵬
傳說明星定入夢方朔跡穢空諧諛不昵不阿余與汝
古交淡淡無嫌猜

寄趙紫芝

別後訪消息傳言一半虛前官已不就所向定何如苦
雨厭羈思春風欺舊廬懷人閉門夕專擬寄來書

會宿趙紫芝宅

郊居無一事喜見友人來促席坐添火推窗立看梅論
詩漏欲盡煮茗匣重開此夜思徐照墓松猶未栽

贈達西堂

却罷住山緣歸來又十年自知身是妄常道鉢休傳塔
路修來直紗燈影處圓與吾相對坐語嘿盡通禪

寄蔡任

不見三百日問君消息多身閒詩有味水盡月無波琴
裏懷孤竹書中寄永和遙憐一江隔何計得相過

送趙紫芝入金陵幕

為官亦儻居官況定何如昨夜交遊散滿湖秋雨疎此
邦佳麗久舊吏拜參初喜是賢侯幕新年有薦書

讀劉靖君碑

儒生身上事皆成身外浮華亦甚輕種竹滿山門逕小

挂冠當路樹枝橫幾于顏子三生壽分得陶潛一字名
何處今時見前輩只看碑語自清心

漁父詞

十載江湖不上船捲蓬高卧月明天今夜泊杏花前只
有苓箬當酒錢

鄰家船上小姑娘兒相問如何是別離雙墮髻一彎眉愛
殺紅鱗比目魚

平明霧靄雨初晴兒子敲針作釣成香餌小繭絲輕釣

得魚兒不識名

繫船蘭汜鱸曲袷方袍忽訪吾神甚爽貌全枯莫
是當年楚大夫

春融水暖百花開獨棹扁舟過釣臺鷗與鷺莫相猜不
是逃名不肯來

夜來采石渡頭眠月下相逢李謫仙歌一曲別無言白
鶴飛來雪滿船

莫論輕重釣竿頭伴得船歸即便休酒味薄勝空甌事

事何須著意求

寄謝黃元信惠茶

建溪金鉞直幾千，余性所嗜已一偏。
尋常草卉不足進，龍團鳳髓如珉堅。
長鬚健卒前月到，手提菜器急取煎。
妻兒攢眉笑苦澁，為言真味茲天然。
易牙去已久，吾齒若貝編。朽腸豈廢食，睡省非壯年。
惜此餘香滯喉頰，巡除吟咏聲譏諷。
詩成寄題建寧郡主茶官，吏俱時賢合。
同緘印，一時畢進奉。飛馳爭春妍，天子不敢嘗。
薦以寢

廟先定自褒嘉到屬郡趣若密邇玉爐煙一以此味沃
天下邪魔驅掃無留連

送子舒弟之官華亭

執手難為別愁看去棹孤船官得閒散春晚過皇都書
附海人便花添佳屋圖有時吟句穩還憶老兄無

送張直翁之筠陽

時平民事少詩句定能清况作江西去放教秋水聲山
花香淡泊湘竹恨分明朝士多知爾慈溪舊有聲

送趙端行廷對少寓期待之意

甲科人亦有難得是家傳定入中朝局還支內府錢服
青初解褐班後忽趨前獨謝歸廊幕詩成第一篇

贈葛天民

逃禪已得計易姓豈云非自說身如幻常人見亦希亭
邊看荷葉樓上掛蓑衣幾夜蘇堤月隨君瘦影歸

送廬次夔兼柬廬九秘書

蔡邕初入直撰著幾時成所取友若此遙知人至清朝

迴叔疏稿夜語雜詩情愧我多年別相煩一寄聲

挽陳叔望

少年曾是魯諸生為立功名別路行嘗捉寶刀嚴漢陞
再持符節領江城絕憐詩律雙金在不見林塘五柳成
明日西山歸葬處踏青人散草初平

送葉季重之官吳門

君繼賢人業試官闔廬門但問要離墓莫看貞娘墳虎
丘寺前生野草一花一葉皆麗好用心冷淡不嗜此自

有詩禮長探討給旁餘閒庭廡空小興應亦上垂虹橋
邊風駛寄書便只看平安報乃翁吾漸空空易疎斥時
亦振衣侍筵席春膏流滑儻寄將待寫續經藏屋壁

寄趙叔魯

相知言莫盡別後意如何命笑春冰薄愁因夜雨多全
家寓京國無地著吟哦會得窮通理從余緝薜蘿

酬劉子至

寄來書一紙別後喜安和想見清高極吟成秋思多山

頭靈運立月下謫仙歌共是江湖客斜陽各曬蓑

賦二十八字

水滿溝塍不愁旱急催租稅却憂貧家人苦不憐余拙
雪袴冰衫要及晨

紀夢曲

夜夢佳人姍且長星冠霞帔雲衣裳雙眉淺淡畫春色
兩耳炫耀垂珠璫組步逡巡倏相近世道人情不可問
斂容正笑發一言不識巫山雲雨恨自從十五學仙經

今年二十身骨清天上有籍昇其名長聲短聲歌紫瓊
之章詞宛轉永與人間風調遠餘聲未竟鐘鼓鳴霧散
烟收人不見

水心先生惠顧瓜廬

未成三徑已荒何勞動先生枉棹過數朶葵榴發深愧
一池鷗鷺避前呵路通矮屋惟添草橋壓扁舟半沒河
再見緇維訪漁父却無漁父聽清歌

題南塘薛圃

門對南塘水亂流竹根橘柢自成洲中間老子隱名姓
只聽漁歌今白頭

巾山

兩峯爭起入雲層半屬虛空半屬僧斜日滿山人到少
任蕃去後我來登

送趙端行

紛紛帝族貴欽茲神秀門永嘉分奕葉甚盛二枝蕃吾
友天樂翁實惟游之孫身雖羈旅盡詩則騷雅存姪行

有科第作尉期高騫是曰提刑後令問方騰喧大心欲
圖南小枝不在言十年相聚首偉論孰敢援交比鮑叔
知志許諸葛論分攜乃明發念我守故園君往夫差國
不遣吳水渾陸靜翫蟾彩江清烹鮪豚邑宰話鄉曲官
廨如荒村昂藏信多暇時憶朋友樽窮達委天分守道
無競奔會當春風吹梅實衆花繁

挽徐道暉

昌黎銘最好友朋更情深身沒復何憾家貧自不禁春

山無死草夏木有清陰為鬼詩還別重來何處尋

漁家

小舟輕似葉曾不畏風濤自說磻溪好翻疑釣瀨高晚
來魚換酒歸去子持篙定是逃名者時聞歌楚騷

梅雨

梅雨潤兼旬暑月不知夏溪流三尺強舟人驚昨夜余
家有瓜田蘋藻分揉藉魚蝦失憑依跳躍至牀下卑濕
畏暮年扶策升臺榭難願方丈食互市物踊價四鄰各

淒涼惟有酒可借五月藉新白咀嚼勝棗炙閉門人事
絕向晚烏巾却震雷壓不住神龍未遑暇或謂蛟為孽
胡不寧爾舍旱澇政本農偏惠及閭架皇天無所私未
遽損禾稼一洗天下清作我聖人化

謝陳水雲寄惠瓜廬字

吾向村中住無人知姓名結廬難得就種樹幾時成扁
榜龍蛇動飛簷燕雀驚自憐幽僻地因此亦敷榮

和梅氏西澗韻

此處宜新月開門亦向西近江湖有信初種樹猶低何
日尋梅隱移船繫柳堤詩篇滿窗戶留壁待余題

秋晚寄趙紫芝

數日秋風冷丘園獨自身閒看籬下菊忽憶社中人苦
詠肩常瘦移家債又新極知君淡漠十載得相親

送王成叟先生訪丁子桓

老懶無拘檢一年身耐貧還思溫嶺去別我苦吟人柳
色行三日雪風浴暮春舊時同學友迎拜綠袍新

和葛天民

賈島文章懷素書得來讀罷卷還舒
西湖柳下為君宅
東海雲邊是我廬
千里江山長若此
一生心抱欲何如
相思惟有加飡飯
不暇逢人寄鯉魚

戲贈趙天樂

問隱當時意已深
近來全廢是清吟
一春只為風雷變
盡日閒觀天地心
聞道丹爐初候火
能教瓦礫化成金
果然成得知何用
不似瓜廬種紫蓀

孤山

不到西湖今幾時
十年雙鬢欲如絲
難尋和靖題詩處
空見梅花成老枝

望夫石

望夫一望幾千年
蒼蘚何曾似翠鈿
却是春深更風雨
滿身吹淚使人憐

喜翁卷歸

我老寡儔侶年荒
值冬迫膝下有啼
寒餅中無儲積豈

不輟轉思自欠經營策儒冠匪謬誤賦性素褊窄淵明
疑夙世荷鋤心便適嗟余四友朋驚見三化魄一翁尚
淒涼六帙困行役家貧病難愈詩苦髮全白昨來扣我
門偶徃比鄰宅聞亟語倒屣已去歟無迹知君懷百憂
雖出難久客從今幸安居況有舊泉石清晨過窮廬竟
夕話疇昔逝者已云遠相期守枯瘠

寄題趙十四知縣聽雪堂

誰彈石上琴涓涓流水響主人性清曠靜夜逾幽想何

心指蓬閬取近對秋蕩應有可人來烟蓑曳雙槳

塔山和徐道暉壁間韻

寺在一山頂江分兩岸田憑何發詩興題宇古廊邊近
地今埋骨間人亦助錢昨宵留宿意不忍上歸船

葉宰赴豐城

君往為官處江西寇已平獄間空劍氣堂靜響琴聲有
法催常稅無私得衆情時方急賢路名定達公卿

喜徐磯至

榮滿自南歸曾過秦系廬無心緣見道會面只如初詩
好多人說官清得薦書柴門勞顧訪未覺四年疎

送蔣肖韓

岳陽有仙跡君去頗相宜已料官閒日多吟湘水師高
風琴斷裂白月酒漣漪無意求人薦惟應我自知

懷趙紫芝

日沈月上暝烟斜收拾漁竿恰到家為憶城南清瘦友
寒宵夢裏見梅花

至日遊湖

此心全剥落今日一陽生自分安身計難逃素隱名賁
中聞道徹閒裏作詩清別有求漁者笑余憂思盈

自題

半生作計在田廬習懶何曾好讀書誰却畫作古人樣
旁邊還是欠犁鋤

送謝強學主建德簿

少年初試吏濯印富春亭水可清人骨山曾隱客星俸

廉專養母政簡靜公庭守是賢侯子應看薦墨青

寄題趙紫芝墓

辛未聯詩別九年成恍惚大星墜地旋無光君身入土
名不沒吳越之水相交流寂寞詩魂何處遊不聞孤鶴
喚人醒空見梅花似人影無復東巖招謝客應住西湖
伴和靖世上如今一句無一靈獨存勢欲孤我有生芻
來未得只愁宿草易荒蕪

贈奭上人

何人養道得如君
房接高樓樓接雲
山地栽梅寒藥瘦
瓦爐留火夜香薰
看經尋義心逾靜
坐默觀身耳不聞
莫道門前是塵市
須知喧寂此中分

哀徐致中

亡友如今隔杳冥
畫身只見病時形
書窗閉久梅添潤
花徑荒來草又青
一卷詩編空就緒
兩年良會覺凋零
幾回行過深深巷
不忍登堂不叩扃

送薛詠

病裏風光總虛擲
岸花園柳雨中休
無端好客隨春去
送酒吟詩一併愁

楊柳枝

門前楊柳君莫折
長于折處生兩枝
兩枝難作一枝合
一心分作兩心時

惟有高枝高莫攀
不堪攀處只堪看
怪得樓頭畫眉婦
春朝長自凭闌干

獨于高處接陽和
占得春風分外多
須信繁華易披拆

不如柔弱拂江河

汴水堤邊薪可束永豐巷內綠成堆
盛衰到底皆惆悵
何不移根種馬嵬

橫參樓和老杜詩

僻懶便幽處江湖深隱心地偏欣
改觀樓豁喜初臨暖
日低輕帽良朋接短襟潮聲全有韻
帆影半回陰翠麓
添重色鱸風出淺林嶼頭烟嶂遠
沙觜浪痕深寂靜雲
歸壑闌珊月近參人家已鼾睡
漁父尚謳吟造化由來

久周迴忽見今愛他斜日照顛倒數山沈

湖上

勢利絕交初瞿然卧隱廬無營心淡泊見客禮生疎
有漁樵伴看多佛老書春深草易長忘却倩人鉏

宿瞿溪

船泊溪西岸人家見晚春疎星寒有雁村寺夜無鐘
竹徑通新店茅柴煖病容農夫不相識問我欲何從

送從善雲遊

雁蕩天台去閒尋倚杖藤路邊應得句禪坐似無能頂
笠偏愁雪山猿不畏僧倘逢清塞伴休願入傳燈

多景樓

跨漸連淮是潤州好山全對此江樓少年志氣慚霜鬢
猶憶曾看打陣舟

送法照

論著天台教詩參左緯來閒行過蓬華相對坐莓苔講
席虛前月重遊約後迴仍聞藏楔帖應許為吾開

送子舒弟赴金陵兼柬宋君輔

祿仕何方好金陵總莫如廟存元帝像家有二王書羽
檄時方急文才用有餘功名收拾了歸食會昌魚

送夏肯父

霜晴雁蕩白五日計鄉程野燒明山店輕輿憩嶺平乞
銘甘久客愛母起歸情孝極天為感師文早晚成

挽林敬之

閉門常讀易遯世意如何有酒可消悶無堦不種莎閒

時尋舊友月夜步新河我亦逃名者題碑愧爾多

金賢良

虛號賢良豈療饑短衣結袖意何為空攜痛哭能言策
不遇勤求下詔時老去說詩猶有味寒來索酒莫教遲
家貧身死知無計自有旁人為立碑

學海樓和水心先生韻

江口潮生夜語喧月殘惟有數星存更憑高處觀空濶
始悟乾坤是易門

夜宿勝因寺有懷

山中初寄隱野寺一天星路遠有如此客來應未能
催寒嫗緯蟬雜夜僧經忽憶忘形友微吟自剔燈

趙成子

早年名字諸公並惟有清聲獨至今辭却雙旌更何事
自扶靈壽欲閒吟病來更作雲歸岫死矣猶如鶴在陰
終始哀榮了無恨只愁塵鎖匣中琴

送子文監草料場

坐局何煩聽曉鷄
豆萁首肯亦詩題
好文不愛今人體
色養寧嫌古署低
翰苑舊交應顧訪
相門新近事招攜
歲寒惟有君於我
老去過從許杖藜

寄雁蕩詩僧

雁蕩峰前夜雨晴
空房不住有蟬聲
一身閒後髮難白
五字吟來思極清
少見出山多入定
還于夏末起秋程
何如更待黃花節
顧我來遊計已成

李白城

野火燒殘竹數枝詩魂飄蕩定何之娟娟秋月照采石
不在荒墳在水湄

漁父二首

偶來浦口芟荷香綠葉叢中睡一場須信至人無妄想
不曾有夢見文王

利薄每年隨分過避名不入愚溪路春深雨足釣絲長
夜來又宿蓑衣步

酬醺席上賦牡丹得日字

粉淡與妖紅占盡陽和出春去在商量更費吟人筆此
是洛陽花尚帶長安日持上使君墀寶餅分甲乙

寄龍虎山道士孔野雲

上清三十六院閣皆幽清漱齒泉新汲晞髮日始升自
除燒墨竈晝夕誦黃庭所得異疇昔出山畏逢迎同當
知非年寄詩聊寫情

夜坐陳縕靈見訪

清夜焚香篆閒看郊島詩自憐多冷淡誰足慰衰遲雪

樹明窓紙餅梅落硯池君心亦無事相對坐移時

送翁靈舒閒遊

袖有新詩如美玉知君去意十分濃山行見草認靈藥
午歇就陰依古松兩鬢已添蓬藁色三年判作冷零蹤
羈情夜後更愁絕深澗斷猿溪寺鐘

先寄郭子奇

世道祇如此君心我得知先教栽菊在預作去官期夢
覺秋風起行吟夜月遲懷人幾十載欣有叩門時

喜葉謙夫歸

老思忽蕭爽親朋得意歸
菊觴奉親壽柳色上儒衣
宅旺看山勢門清有釣磯
我來聊問字澹出月侵扉

挽潘母

獨翫隔廳月淒涼三十年
眇然儒素業翻以母儀傳
生計無中有衰齡病後延
誰為市貞石高刻墓之前

送趙主簿

內地無烽火詩人入仕林
定將詠物意移作愛民心
晤

語初同調分攜便不禁卜鄰曾有約久後得相尋

送陳器之赴紹興初官

郡古湖如鏡照人心
膽清閒曹應事簡
盡日讀書聲
府主舊知舉同僚
親弟兄人言宦遊樂
難得比君榮

哭周宗彞

已嘆交情看漸少
聞君怛化重傷神
手栽寒竹惟添笋
堂掩空山不見人
舊說媿婚今且置
新懷情悃向誰陳
獨憐頭白曾參母
清夜悲號血淚頻

送項季約入城都幕

閣書入兵幕束袖學戎裝峽峭船侵月秋清猿嘯霜迂
程看陣磧到處宿詩堂若比仲宣樂輸君髮未蒼

送郭子奇

永嘉官滿後歸處是仙居柳舞陶潛徑桃迎阮肇車名
高唐寺塔篋滿晉人書看步青雲上題緘寄隱廬

送趙澤民赴鄆縣

高人為令尹政事豈尋常炎月不避暑清風月自涼水

流衡嶽色酒帶芷蘭香遠想濯纓暇思予有詠章

大龍湫

昔聞天下山衡嶽稱崇丘又聞天下水流漢為巨流古
有山海經歷歷叙九州李唐三百載詩家一無留及觀
酈道元此地亦不收不知諾矩那何事能窮搜我來玄
妙境萬丈懸清秋石壁去無極百里彌道周雲氣冒羣
岫龍宮深以幽輕輿巖壑底竟日涉溪遊陰晴異瞻矚
遠近難搜鏤飄如飛素練粲若散琳瑯風欣一潭雨佛

坐四時秋喧呼勢益驟洶湧聲彌道變化有如此溥博
誰與儔吾謂神龍力豈翳神鬼謀稽首荷玄遇坐久勞
雙眸一盃却嵐暑旋步轉雷稠以吾淡世慮歛起杞人
憂何當騎天浪滿引躬斗牛

斷橋

獨扶瘦杖欲經過為問高僧意若何自倚神通能渡水
却言佛法本無多

寒山寺壞莊產盡為勢所奪余遊天台甚為普賢

惜之陳約甫攝郡號不畏強禦者必能與寒山出
氣

寒山寺廢佛燈寒有客來遊欲住難夙世問丘今攝郡
不妨饒舌似豐干

哭劉詠道

案上韓文與杜詩小齋寒淡亦相宜人憐貧病憂無計
自說文章樂未涯禮合古初山友哭拊從先世夕郎知
生平直諒嗟何往不是哀辭是誄辭

送張直翁

宰公詩句是騷人官舍況臨湘水濱
衡嶽望中思策蹇
滄浪清甚欲垂綸長於一縣花開後
獨訪三閭廟裏頻
元亮何曾藉知己翻然出處自由身

送王倅之興化

梅溪好景委流德至今存獨繼賢人業
共推君子孫
官清五字好州小二車尊所歷七閩郡
從茲水不渾

挽趙孺人余中表也

欽定四庫全書

所穿名賢小集
卷三百五十

三

幼小同羣戲年加各所之常疑艷花卉終是易離披夫
壻新袍綠兒男半髮世送歸蒿里道興我渭陽思

趙叔魯端行胡像德攜酒見顧

一賢二公子枉駕瓜廬丘烹魚載美酒竟夕為我留評
詩仍和曲舉白不計籌情忘覺歡暢禮厚愧莫酬今朝
風雨橫欲謝出無由

挽徐左史

左史聲名空復存如今往事不堪論惟攄指佞當前陛

已判身歸老故園
驄馬引喪寒有淚
麒麟卧塚寂無言
人生遇合萍相似
何處分明怨與恩

送鮑份父

地僻官仍小
茲行古迹多
翟羅應失笑
龐縕亦經過
宦業知餘事
宗風竟若何

缺

挽張彥父提舉

七十童顏在
脩然物外幽
組衣藏蠹篋
散服上漁舟
此日移松葬
前時為菊留
山連象浦館
誰記孟家遊

淨光長老極能詩

近住城中寺陰雲漬竹房雨多香篆久春去藥苗芳室
裏從人問吟邊與世忘一身全是道頭白有何妨

朱清之

滌水日夜白之人信所宜隱于陶令酒甘謝郝詵枝江
渡月偏滿家庭歲有規不知君役後誰主菊花期

送蔣肖韓赴弋陽

弋水橋邊接長官水晶山色讓清寒共知彫敝今稱劇

自倚廉勤道不難
吏退早衙花谷靜
鶴翔秋祀訟庭寬
從來遇事無凝滯
應只愛民勞寸丹

送謹師

謹師牢絆脚語別意茫茫入寺春
隨杖當禪月滿牀
多因新見解拋却舊篇章
為我金山去鉗鋌問一場

挽宋耆卿

人如韞玉操如冰
拾芥推梨世豈能
案上有琴忘舊響
墓頭無火續寒燈
一官祇是幽閒過
百行惟須健筆稱

此曲調高知者少朗吟喚得九原磨

送高郵周主簿兼呈陳居端

遶縣重湖色難同主簿清雖云古郵置不似近邊城月
落淮田濶風晴隋柳輕鄉人在曹職相答為詩情

寄守上人歸閩省親

從小服緇素三衣竟不長心空無物礙頂重有詩囊去
與雲相似來期春未央家山指萱草微笑奉高堂

無題

平生愛菊與梅俱
菊比淵明梅似逋
誰知此道今寥落
愛菊愛梅人也無

戊子七月十一日

貧因幾首詩間高一著
棊瓜田嘗默坐不願有人知

兩宋名賢小集卷三百五十